




ARREST DE LA COVR
DE PARLEMENT:

*Portant Reglement pour la nourriture &
education des Enfans trouuez & exposez
de la ville & fauxbourgs de Paris.*

Extraict des Registres de Parlement.

 N T R E le Procureur General
du Roy, demandeur pour raison
de la nourriture & education des
Enfans trouuez & exposez en
ceste ville & fauxbourgs de Paris
d'une part: Et les Doyen, Chanoines & Cha-
pitre de l'Eglise Nostre-Dame en ceste dite ville
de Paris, defendeurs en ladite matiere d'autre.
Et encores entre ledit Procureur General de-
mandeur en ladite matiere d'une part: & l'Eues-
que de Paris, les Religieux, Abbé & Conuent
S. Germain des Prez, & saint Victor lez Paris,
les Religieux, Abbé & Conuent de saint Ma-
gloire à Paris; les Religieux, Abbé & Conuent
de sainte Genevieve du mont de Paris; les
Religieux, Abbé & Conuent de Thiron; les

Religieuses, Abbessse & Conuent de Montmartre lez Paris; le grand Prieur de France Commandeur du Temple de cestedite ville de Paris; les Religieux, Prieur & Conuent de saint Martin des Champs à Paris; les Religieux, Prieur & Conuent de saint Denys de la Charre; les Religieux, Prieur & Conuent de saint Eloy en la cité de Paris; les Religieux Prieur & Conuent de Nostre-Dame des Champs; les Religieux, Prieur & Conuent de saint Ladre lez Paris; les Doyen, Chanoines & Chapitre de saint Marcel lez Paris; les Cheueciens & Chanoines de saint Merry à Paris; les Chanoines de saint Benoist le bien tourné à Paris, appelez pour contribuer à la nourriture & entretenement desdits Enfans trouuez, d'autre. Veu par la Cour les demandes dudit demandeur respectiuellement baillées contre lesdits defendeurs, les defenses desdits Doyen, Chanoines & Chapitre de ladite Eglise Nostre-Dame, la copie des defenses baillées par autres des dessusdits defendeurs, les repliques dudit demandeur, & tout ce que par luy & lesdits Doyen, Chanoines & Chapitre a esté mis & produit pardeuers ladite Cour: Forclusion de produire & bailler contredits par ledit demandeur contre les autres dessusdits defendeurs: l'Arrest interlocutoire du vnzième Decembre 1546. les papiers de recepte & despenſe du reuenu de ladite

Eglise Nostre-Dame mis pardeuers ladite Cour suiuant ledit Arrest: Acte du troisieme Iuliet 1550. par lequel Maistre Vulfrain Fouquet Chanoine de ladite Eglise au nom & comme Procureur desdits Doyen, Chanoines & Chapitre, & de chacun d'eux, s'est purge par serment qu'il n'y a & n'ont aucune fondation de l'hospice des Enfans trouuez en cestedite ville de Paris, dit les Enfans trouuez de ladite Eglise, & qu'ils n'en ont veu ny sceu aucune chose par dol & fraude n'ont delaisse à l'auoir & posseder. Autre acte du troisieme May 1552. par lequel ledit Procureur General du Roy a declare ne vouloir prendre conclusions contre les Maistres & Administrateurs du saint Esprit & Sepulchre, & Administrateur des Hospitaux de cette ville de Paris, & accorde que le procez soit iugé en l'estat qu'il est, & sur les conclusions par luy prises au procez. Forclusions d'en fournir par lesdits Maistres & Administrateurs de l'Hostel-Dieu de cette ville de Paris & de fournir au contenu dudit Arrest le 11. May mil cinq cens quarante six. Autres forclusions d'informer par lesdits Euesque de Paris, Religieux, Abbé & Conuent de saint Denys, saint Germain des Prez, saint Victor, sainte Geneuefue & conforsts, du fait contenu audit Arrest par eux articulé. Interrogatoires faits par ordonnance d'icelle Cour à Maistre Claude Goutart

commis à distribuer les deniers ordonnez pour
 la nourriture & entretenement desdits Enfans
 trouuez, & à Thomasse Herué Garde desdits
 Enfans, & ayant la charge de les receuoir quād
 ils y sont apportez, certain liure, & registres ex-
 hibé par ledit Goutart par ordonnance de la-
 dite Cour, contenant les noms & surnoms des-
 dits Enfans, le iour qu'ils ont esté apportez,
 aussi la distribution des deniers qui ont esté em-
 ployez pour & à cause desdits Enfans, par or-
 donnance desdits Doyen, Chanoines & Cha-
 pitre ou autrement, ensemble tout ce qui a esté
 produit par ledit Procureur General du Roy,
 & iceux Chanoines & Chapitre pardeuers la-
 dite Cour. Et tout considéré, DIT A ESTE'
 faisant droict sur les conclusions prises par le
 Procureur General du Roy à l'encontre desdits
 Euesque, Doyen, Chanoines & Chapitre d'i-
 celle Eglise, & conclusions que ladite Cour a
 condamné & condamne lesdits deffendeurs à
 nourrir & entretenir & alimenter les pauvres
 Enfans trouuez & exposez en cette ville, &
 pour ce faire a ordonné & ordonne que lesdits
 deffendeurs par prouision, & sauf à faire par cy
 apres plus, s'il y eschet, seront tenus respectiue-
 ment payer & continuer par chacun an la som-
 me de *neuf cens soixante liures parisis*, payables
 par chacun an à trois termes, le premier terme
 commençant le premier iour de Septembre

prochainement venant , le deuxiesme le premier iour de Ianuier, & le troisieme le premier iour de May apres ensuiuant. C'est à sçauoir le-
dit Euesque de Paris la somme de six vingts li-
ures parisis par chacun an, lesdits Doyen, Cha-
noines & Chapitre la somme de trois cens soi-
xante liures parisis, l'Abbé de saint Denys en
France vingt - quatre liures parisis, l'Abbé de
saint Germain des Prez six vingts liures parisis,
l'Abbé de saint Victor quatre vingts liures
parisis, l'Abbé de saint Magloire vingt liures
parisis, l'Abbé de sainte Geneuiefue trente
deux liures parisis, l'Abbé de Thiron quatre
liures parisis, les Religieuses, Abbessse & Con-
uent de Montmartre quatre liures parisis, le
Grand Prieur de France & Commandeur du
Temple de cette ville de Paris quatre vingts
liures parisis, le Prieur de saint Martin des
Champs soixante liures parisis, le Prieur de
saint Denys de la Chartre huit liures parisis,
les Doyen, Chanoines & Chapitre de saint
Marcel huit liures parisis, les Cheueciens &
Chapitre de saint Merry seize liures parisis,
les Chanoines de saint Benoist le bien tourné
douze liures parisis. Et a condamné & con-
damne iceux defendeurs respectiuemēt à payer
icelles sommes ausdits termes dessusdits, & à ce
faire seront contraints par saisie de leur tempo-
rel, & autres voyes deuës & raisonnables. Et a

ladite Cour, pour certaines grandes causes & considerations à ce mouuans, ordonné & ordonne que les deniers cy dessus adjugez pour ladite nourriture & autres qui seront aumosnez ausdits Enfans, seront mis és mains des Maistres & Gouverneurs de l'Hospital de la Trinité, ou leurs Receueurs & Commis, pour estre employez à la nourriture & entretenement desdits Enfans exposez: Lesquels par tant seront tenus de receuoir lesdits Enfans qui leur seront portez, & iceux faire nourrir & entretenir & alimenter. Lequel Receueur & Commis fera compte à part desdits deniers & despeses, & iceluy rendra en la forme & maniere par lesdits Maistres & Gouverneurs gardée à la reddition des comptes de l'administration des biens dudit Hospital, & sera par eux commise vne femme pour receuoir les Enfans qui seront exposez soit en ladite Eglise de Paris ou ailleurs. Laquelle femme fera residence à receuoir lesdits Enfans en la forme & maniere qui par cy deuant a esté gardée en ladite Eglise de Paris, & iceux par elle receuz seront par lesdits Administrateurs baillez à femme honneste & cogueuë pour iceux nourrir & eleuer. Et neantmoins a ladite Cour ordonné & ordonne que le berceau & boiste estans en ladite Eglise de Paris pour receuoir lesdits Enfans exposez, & aumosnes à eux faites, demeure-

ront en icelle Eglise, & que la femme qui cy
 deuant en a eu la charge pour receuoir les En-
 fans exposez en ladite Eglise, aura les salaires
 qui par cy deuant luy ont esté ordonnez par les-
 dits Doyen, Chanoines & Chapitre, à la charge
 que sil y a aucuns enfans exposez mis en ladite
 Eglise, elle sera tenuë les receuoir & faire por-
 ter audit Hospital de la Trinité. Et outre, ladi-
 te Cour a ordonné & ordonne que lesdits
 Doyen & Chapitre de Paris feront bailler par
 leurs Commis les noms des Enfans qui sont
 presentement nourris par leurs ordonnances,
 ensemble les noms des meres qui les nourris-
 sent, & demeurâces d'icelles. Et ce faict, a ladite
 Cour enjoint ausdits Maistres & Gouverneurs
 de faire voir & visiter lesdits Enfans nourris,
 pour voir s'ils sont entretenus & alimétez cōme
 il appartient. Et si le prix auquel a esté conuenu
 avec lesdites meres, n'est raisonnable, & suffi-
 sant pour la nourriture desdits Enfans, & là
 où seroit trouué ledit prix ne pouuoir suffire
 pour nourrir & entretenir & alimenter lesdits
 Enfans, lesdits Maistres iceluy augmenteront
 en façon que lesdits Enfans puissent estre nour-
 ris & esleuez. Neantmoins a ladite Cour or-
 donné & ordonne que lesdits Doyen, Chanoi-
 nes & Chapitre seront tenus de payer la despen-
 se & nourriture desdits Enfans iusques au pre-
 mier iour de Septembre prochainement ve-

nant, & dudit iour en auant en seront lesdits Doyen, & Chapitre deschargez, & en demeurera la charge ausdits Maistres & Gouverneurs de l'Hospital de la Trinité. Et outre enjoint ladite Cour ausdits Maistres & Gouverneurs de l'Hospital de la Trinité soy enquerir diligemment de la qualité des Enfans qui seront exposez, à ce qu'il n'y ait aucun abus. Et là où se trouueront aucuns peres & meres auoir exposé lesdits Enfans, d'en aduertir le Substitut dudit Procureur general du Roy au Chastelet, auquel ladite Cour enjoint d'en faire poursuite, à ce que punition exemplaire en soit faite, sans que pour raison de ce soit cependant différée la reception desdits Enfans audit Hospital. Et quant à la demande faite par lesdits Doyen, Chanoines & Chapitre de l'Eglise de Paris à l'encontre dudit Procureur general du Roy & les Maistres & Administrateurs des Hospitaux de cestedite ville, ladite Cour a mis & met lesdites parties hors de Cour & de procez. Et a ladite Cour enjoint audit Procureur general du Roy de faire executer ce present Arrest. Prononcé le trezième iour d'Aoust l'an 1552.

Signé, DV TILLET.



CONTRACT PORTANT

donation de cent trois liures trois sols sept deniers tournois de rente aux pauvres Enfans trouvez de la ville & faux-bourgs de Paris, faite à condition expresse que le donateur & ses enfans masles seront appelez à la redition des comptes qui se rendront du reuenu destiné pour l'entretien & nourriture desdits Enfans trouvez.



ARDEVANT les Notaires Gardenotes du Roy nostre sire en son Chastelet de Paris, soussignez. Furent presens en leurs personnes noble homme Iean Baptiste Hautin Conseiller du Roy en la Preuosté & Siege Presidial dudit Chastelet de Paris, Dame Claude Danys sa femme, de luy autorisée, demurant ruë des mauuais Garçons, paroisse saint Iean en Greue, lesquels estans bien informez du peu de reuenu qui est affecté à la nourriture & entretien des Enfans trouvez de

ceste ville de Paris, & desirans faire quelque œu-
 re agreable à Dieu selon les commoditez qui
 luy a pleû leur donner, ont volontairement re-
 cognu & confessé auoir donné, cédé, quitté,
 transporté & delaisié, du tout des maintenant à
 tousiours, par donation irreuocable, faite en-
 tre vifs, & en la meilleure forme que faire se
 peut, à la maison des pauues Enfans trouuez
 de ceste ville de Paris, ce acceptant pour ladite
 maison, par Maistre Iacques Dieu Chanoine
 del'Eglise de Paris, Receueur commis à la re-
 cepte & despenſe desdits Enfans trouuez, ayant
 pouuoir d'accepter ladite donation des Sei-
 gneurs haut Iusticiers contribuables à la nour-
 riture desdits Enfans trouuez, par acte, signé
Baudouin, du 11. de May dernier, ledit Dieu à
 ce present; & par lesquels Seigneurs hauts Iusti-
 ciers, ledit Dieu promet faire ratifier & auoir
 pour agreable le present Contract toutefois &
 quâtes des cent trois liures trois sols sept deniers
 de rente en quatre parties audit sieur & Dame
 Hautin, appartenans de leur propre, assignées
 sur l'Hostel de ceste ville de Paris, sçauoir soi-
 xante & vne liures trois sols sept deniers de ren-
 te, faïsans partie de cinq cens liures de rente
 vendus & constituez par Messieurs les Preuosts
 des Marchands & Escheuins de ceste ville de
 Paris à Pierre de Caen l'aîné, le 6. Feurier

1562. sur le Clergé de France. Item quinze li-
 ures de rente constituez par lesdits sieurs Pre-
 uost des Marchands Escheuins le 4. iour de Fe-
 urier 1569. à Claude Hinselin bourgeois de Pa-
 ris, sur le subside de cinq sols pour muid de vin,
 és villes declarées par lesdites lettres de consti-
 tution. Item, dix liures tournois de rente con-
 stituez par ladite ville à feu Guillaume Bannier
 le 25. Aoust 1553. sur les greniers à sel de Mont-
 fort l'Amaury, Chasteau-thierry, & autres.
 Item dix sept liures tournois de rente, faisant
 partie de cinq cens quinze liures de rente con-
 stituez par ladite ville à Maistre Iean de Castille
 le 12. Aoust 1585. sur les greniers à sel d'outre
 Seine, Yonne, Picardie, Champagne, & au-
 tres, desquelles rentes ledit sieur & dame Hau-
 tin font ladite maison & Enfans vrais aeteurs
 propriétaires & possesseurs, les subrogent en
 leur lieu & place, pour en iouir par lesdits en-
 fans, leurs succeffeurs à l'aduenir, à commen-
 cer, sçauoir pour celle du Clergé du 1. Octobre
 1620. de celle des Aydes du 1. Aueil 1616. & de
 celle du sel du premier Octobre 1623. Cette do-
 nation faite pour les causes & raisons susdites,
 transportans, delaisfans, voulans, &c. Procureur
 le porteur, donnant pouuoir, & à condition que
 ledit sieur Hautin sera appellé à l'audition &
 examen des comptes qui se rendront cy-apres

du reuenu desdits Enfans, pour cognoistre de de l'employ, recepte, & despense dudit reuenu, & apres le deceds dudit sieur Hautin sera appellé en son lieu à l'audition desdits comptes l'aîné de ses enfans masles, & ainsi successiue-ment les aînez masles descendans desdits aînez masles, & au defaut des enfans masles de la ligne desdits aînez, les aînez masles de la ligne du puisné apres ledit aîné, sera pareillement appellé, & ainsi de ligne en ligne successiue-ment tant qu'il y aura des masles, & les lignes des masles estant finies seront aussi appellez à l'audition desdits comptes les aînez masles de la fille aînée dudit sieur Hautin, tant qu'il y aura des masles en ladite ligne, & apres eux les aînez masles de la puisnée tant qu'il y en aura, & au defaut des masles tant des lignes des masles que des filles dudit sieur Hautin, sera toujours appellé l'aîné de la maison, qui portera le nom de Hautin, & ses descendans en la mesme forme qui est cy-dessus spécifiée pour les enfans dudit sieur Hautin, fors que les enfans, quoy que masles des filles des collateraux dudit sieur Hautin n'y seront iamais appellez, ains seulement les enfans masles des masles, auquel sieur Hautin & à l'aîné desdites familles sera loisible de reuoquer sa presente donation, en cas que les arrerages desdites rentes fussent di-

uerties & employées à autre effet qu'à la nourriture desdits Enfans, auquel cas il sera tenu de remployer les rentes données par le present Contract en autres œuures pieuses, aux mesmes cōditions dudit Cōtract, car ainsi a esté accordé entre lesdites parties en faisant & passant ces presentes, promettans, obligeans, chacun en droict soy, renonçans. Fait & passé à Paris en l'estude de Bonot l'un desdits Notaires l'an 1628. le Ieudy 15. iour de Iuin apres midy, & ont signé la minute des presentes demeurée vers ledit Bonot l'un desdits Notaires.

Signé, BONOT & BLOSSE.

L'AN mil six cens vingt-huict le Mercredy vnziesme iour du mois d'Octobre, le present Contract portant donation a esté apporté au Greffe du Chastelet de Paris, & iceluy insinué, accepté, & eu pour agreable, aux charges, clauses & conditions y apposées, & selon que contenu est par iceluy par noble homme Maître Iean Baptiste Hautin Conseiller du Roy en la Preuosté & siege presidial du Chastelet de Paris, & par Dame Claude Danys sa femme donateurs, presens en personne, tant pour eux & en leurs noms, que pour leurs enfans masles, ainsi qu'il est dit & déclaré par ledit Contract, & encores requerans l'insinuation pour la

maison des pauvres Enfans trouvez de ceste ville de Paris, tous nommez & declarez audit present Contract, lequel a esté enregistré au quatre-vingt troisieme volume des Insinuations dudit Chastelet, suiuant l'Ordonnance, ce requerant ledit sieur & Dame Hautain donateurs, qui de ce ont requis & demandé acte à eux octroyé, & baillé ces presentes, tant pour eux seruir & valoir, & à leursdits enfans masles, ainsi qu'il est dit par ledit Contract, que à ladite maison des pauvres Enfans trouvez de ceste ville de Paris, donataires en temps & lieu ce que de raison. Fait audit Chastelet les iours & an que dessus.

Signé, DROVARD & REMY.

Au bas est l'approbation, confirmation, & homologation de Monsieur l'Archeuesque de Paris, du vinguatriesme iour d'Aoust mil six cens vingt-neuf. Signé, BAYDOVYN.



CONTRACT DE DONATION

de cinquante liures de rente assignée sur les greniers à sel de ce Royaume , faite au Curé & Vicaire de l'Eglise de saint Landry , à la charge de baptiser tous les Enfants trouvez & exposez qui seront apportez en la maison de la Couche , soit qu'ils ayent le crespneau ou quelques billets , portans qu'ils ayent esté baptisez sous les conditions toutesfois qu'ils n'ayent esté baptisez, ce qui a esté par eux accepté ; & mesme de tenir registre fidelle de tous les Baptesmes qui sy feront à l'aduenir desdits Enfants trouvez.



ARDEVANT les Notaires & Gardesnotes du Roy nostre sire au Chastelet de Paris , souffignez. Fut present en sa personne noble homme Sebastien Hardy sieur de l'Estouruille & de la Tabaise , Conseiller du Roy , & Receueur ancien des Aydes & Tailles de l'Eslection du

Mans, & Damoiselle Catherine Belot sa femme, de luy autorisée, demeurans rue des Blancs-manteaux, paroisse de saint Mederic. Lesquels ont volontairement reconnu & confessé auoir donné, cédé, quitte, transporté & delaisié dès maintenant à tousiours, par donation irreuocable faite entre vifs, en la meilleure forme que faire se peut, au Curé de la paroisse de saint Landry, & à ses successeurs Curez, ce acceptans par venerable & discrete personne Maistre Louis Messier Docteur Regēt en la faculté de Theologie à Paris, à present Cuté de ladite paroisse saint Landry, demeurant au College de Sorbonne, paroisse de saint Benoist, à ce present, & ce acceptant tant pour luy que pour ses successeurs Curez de ladite paroisse saint Landry, cinquante liures tournois de rente vendus & constituez audit sieur Hardy par Messieurs les Preuosts des Marchands & Escheuins de la ville de Paris, par contract passé pardeuant Bruneau & Richer Notairés au Chastelet de Paris, le 25. iour de May 1635. à prendre sur les deniers des Gabelles & greniers à sel de ce Royaume, de laquelle rente de cinquante liures ledit sieur Hardy & Damoiselle Belot sa femme, font ledit sieur Curé & ses successeurs vrais aēteurs propriétaires & possesseurs, les subrogeant en leur lieu & place, pour
en

en iouir à l'aduenir , à commencer du 1. iout d'Octobre 1636. dernier passé. Cette donation faite audit sieur Curé & ses successeurs pour autant de temps que les Enfans trouuez de cette ville & faux-bourgs de Paris , seront portez & logez en vne maison située au port saint Landry , paroisse dudit saint Landry , appelée vulgairement la Couche ou la maison des Enfans trouuez , ou autres logis située en la paroisse dudit saint Landry , à la charge de Baptiser par ledit sieur Curé de saint Landry , ou faire baptiser par son Vicaire tous les Enfans trouuez qui seront apportez à ladite maison , sans en excepter aucun , aux conditions ordinaires des Baptesmes qui se font quand il y a quelque doute que les Enfans n'ont receu le saint Sacrement de Baptesme , soit qu'ils ayent vn Billet ou vn cressemeu ou non , & de tenir ou faire tenir bon & fidel registre de tous les Baptesmes qui seront faits , & des noms des Enfans qui auront esté baptisez , auquel effect , & pour obuier aux abus qui se pourroient commettre par les gouuernantes , nourrices & seruantes , ou celles qui ont charges desdits Enfans trouuez , ledit sieur Curé & ses successeurs les feront aduertir , & enjoindront tres-expressément ausdites gouuernantes de faire sçauoir promptement audit

sieur Curé ou à son Vicaire toutes & quantes
 fois que l'on aura apporté des Enfans trouvez à
 ladite Maison de la Couche, pour leur estre
 conferé ledit Sacrement de Baptême, dans le-
 quel registre sera fait mention de la rue en la-
 quelle auront esté leuez lesdits Enfans. De la-
 quelle somme de cinquante liures lesdits sieur
 Curé ou ses successeurs en prendront la moitié,
 & bailleront l'autre moitié à leur Vicaire qui
 tiendra ledit Registre, lequel registre sera com-
 muniqué à tous ceux ou celles qui voudront
 procurer quelque bien & aumosnes pour les-
 dits Enfans trouvez. Cette donation faite pour
 les raisons susdites, transportans, delaisans, &
 se dessaisissans de tous droicts, voulans, &c. Pro-
 cureur le porteur des presentes, & donnans
 pouuoir, & à condition que si lesdits Enfans
 trouvez estoient cy-apres logez & retirez en
 vne autre paroisse qu'en celle dudit saint Lan-
 dry, ladite rente sera payée au Curé de la paroisse
 où lesdits Enfans trouvez seront logez, aux
 mesmes charges & conditions cy dessus decla-
 rées, dautant que telle est l'intention desdits
 donateurs, & qu'il a esté ainsi accordé entre
 lesdites parties en faisant & passant ces presen-
 tes, promettans & obligeans chacun en droict
 soy, renonçans, & ce fait & passé en l'estude

des Notaires soubssignez , le sixiesme iour de
May mil six cens trente-sept , & ont signé la
minute des presentes avec lesdits Notaires
soubssignez , demeurée vers Lesemelier l'un
d'iceux.

Signé, LE CAT & LESEMEILIER.

des Noirs s'abandonner, le dixième jour de
May mit à exécution le plan, et ont signé la
minute des présentes avec ledits Noirs
s'abandonner, demeurés vers l'assemblée l'an
dix-huit.

Signé, Le Cat et L'EMMETTE.